

# ጳውሎስ ዲሞትሳስ ፃፊዳ ኮይሮ ኪታ ጊዳ ቆፋ

ዲሞትሳ ጌቲቲዛ ኢሲ ናቴላ ናይ ኢዛሰካ ዩሌቴላ ዳሬይ ቄሪ ኢሲያ ጊዲሺን፤ ኢዛ ኣዬያ ኣይሁዳ ኣሴ፡ ኣዋይ ቃሴ ገሪኬ ኣሴ። ኢዚ ሚሺራቾ ቃላ ኦሶን ጳውሎሳራ ኢሲፌ ኦሊዛ ማታ ላጌ። (ሃዋ 16:1-3) ጳውሎስ ዲሞትሳስ ኮይሮ ፃፊዳ ኪታዚ ሄቩ ኣይፌ ዮጎታ ኣይኪዳሰ።

ሄ ኪታዛን ኣይፌ ቆፋይ ሰንሳተዲ ዋሳ ኬላ ጋርሳን ዳንዲዳ ዋርዶ ቲሚርቴፌ ኣሳይ ናጌታና ማላ። ሃ ዋርዶ ቲሚርቴዚ ሳገይ ኣይሁዳታፔ ሳገይ ቃሰ ኣይዛቤታ ቆፋ ኣይኪዳዚ ጊዲሺን “ሃይሲ ኣይፌን ቤቲዛ ኣላሚዚ ናጋራን ሞሬቲዳ ገሽ ኣሳሰ ፓጂቴላ ቤታናይ ሃራ ዲማ ዲማ ፀራ ኤራቴላን፤ ኢሲ ኢሲ ቁማታ ሞንታ ኣጎን፤ ኤኮንታኔ ጌሎንታ ኣጎና” ገዛ ቆፋ ማላ። ሄሳፊካ ቦላራ ኢዛ ኪታዚ ዋሳ ኬላ ኣይሶ ገሺኔ ፆሴ ጎይኖ ገሽ ታማርሲዛ ዋጋይ ሄሳፊካ ዋሳ ኬላ ጨማቲኔ ኢሰታ ማዲዛይታሰ ዳዳናሰ ቤሲዛይ ኣዛኮኔ ዮቴሰ። ወርሴላን ዲሞትሲ ዩሴሰ ኪርሰቶሳሰ ሎፖ ኦላንቻ ዋኒ ጊዳናሰ ቤሲዛኮኔ ኢዛሰ ዲማ ዲማ ኣማኒዛይታ ቦላ ዲዛ ኣላፊቴላ ገሽ ጳውሎስ ኢዛሰ ኢሚዳ ዞሬ ቤዮሰ።

ሃ ማፃፋይ ኣይኪዳ ኩሜላ ቆፋ  
ጌሎሶ 1:1-2  
ዋሳ ኬላ ገሺኔ ዋሳ ኬላ ጋርሳን ኦሊዛይታ ገሽ 1:3-3:16  
ዲሞትሳስ ኢዛ ኦሶ ገሽ ኢሜቲዳ ቲሚርቴ 4:1-6:21

1 ኦና ኣሺዳ ፆሳን፣ ኦሰ ሂዶታ ጊዲዳ ዩሴሰ ኪርሰቶሳ ኣዛዘን ሃዋሬ ጊዲዳ ጳውሎሳፔ 2 ኣማኖን ታሰ ቱሙ ና ጊዲዳ ዲሞትሳስ ፆሳ ኦ ኣዋፔ ኦ ጎዳ ዩሴሰ ኪርሰቶሳፔ ኪያቴላ፣ ማርቴሊኔ ሳርይ ኦሰ ጊዳ። \*

ዋርዶ ኣሰታማሬታፔ ናጌታና ማላ ኢሜቲዳ ኣዛዘ

\* 1:2 ሃዋ 16:1

3 ታኒ ማቂደኒያ ባሽ ኔና ሃዳራ ጊዳ ማላ ሃይሳፌ ሲንጻን ኢሲ ኢሲ አሳቲ ዋርዶ ቲሚርቲ ታማርሶንታ ማላ ኔ አዛዛናሰ ኤፌሶንን ዳሻ። 4 ቃሴካ አሳይ ዮቲን ወርንታ ቤኒ ዋዴ ሃይሲዔን ባ ዋዴ ወርሶንታ ማላ አዛዛ። ሄይታ ማላ ዮዖይ ፓላማ ዴንፌፌሰ አቲን አማኖን ኦሴቲዛ ያሳ ኦሶሰ አይኮካ ጎዔና። 5 ሃ አዛዘዛሰ ዋና አይፌ ዮዖይ ጊዲኮ ጌሻ ዋዘናፔ ሎዖ ቆፋራ ሄሳሶካ ቱሙ አማኖፔ ቤቲዛ ሲቆ። 6 ኢሲ ኢሲ አሳይ ሃይታፔ ፖቂ ኤቂዲ ጎሳይ ባይንዳ ዮዖታኮ ሲሚዴሰ። 7 ዋጋ ታማርሲዛይታ ጊዳና ማላ ኮዬቴሰ። ጊዲኮካ ኢሰቲ ባ ዮቲዛይሳ ዋይኮ ኬሂ ሞቴቲዛ ዮዖዛ ሎዔላ ኤሬቴና።

8 ጊዶ አቲን አሲ ማራን ጎዔቲዛኮ ዋጋይ ሎዖ ጊዲዳይሳ ኑ ኤርሰ። 9 ቃሴካ ዋጋይ ኢሚቲዳይ ዒሎ አሳሰ ጊዶንታ ዋጋ ዮዲ አዲዛይታሰ። አዛዜቶንታይታሰ። ያሳሰ ባቦንታይታሰ። ናጋራንቻታሰ። ጌሻቴላ ባይንዳይታሰ። ያሴ ለቂዛይታሰ። ባ አዮኔ ባ አዋ ዋዲዛይታሰኔ ሾምፖ ዋዲዛይታሰ ጊዲዳይሳ ኑ ኤርሰ። 10 ሄሳሶካ ላይማቲዛይታሰ። አዴራ አቂዛ አዴታሰ። አሰ ባይዚዛይታሰኔ ሻሚዛይታሰ። ዋርዳንቻታሰ። አሳሰ ዋርዶራ ጫቂዛይታሰ። ሎዖ ቲሚርቲራ ኤቂቲዛ ኡባታሳ። 11 ሄ ሎዖ ቲሚርቲይ አንጃቲዳ ያሲ ታሰ ሃዳራ ኢሚዳ ቦንቾ ሚሺራቾ ቃላራ ጋጊዛይሳ።

**ጳውሎሳስ ኢሚቲዳ ያሳ ኢሞታ**

12 ታና ባ ኦሶሰ ሹሚዲኔ አማኔቲዛዴ ኦላ ኤኪዲኔ ታሰ ሚናቴላ ኢሚዳ ኑ ጎዳ ዬሱስ ኪርሰቶሳ ታ ጋላታይሰ። 13 ሃይሳፌ ካሴ ታ አይ ማላ አሰ ጫዩዛዴኔ ጎዴላዛዴ፣ ቃሴ ማካላ አሰ ጊዲኮካ ሄሳ ታ ኤርንታኔ አማኖንታ ዳሼ ኦላዳ ጊሽ ያሲ ታና ማሪዴሰ። \* 14 ዬሱስ ኪርሰቶሳፔ ጊዲዳ አማኖራኔ ሲቆራ ኑ ጎዳ ኪያቴላ ታሰ ኬሂ ዳሪዴሰ።

15 ዬሱስ ኪርሰቶሲ ናጋራንቻታ አሻናሰ ዲጌ ሃይሳ ሃ አላሚ ዬዴሰ ጊዛ ቃላይ ቱማኔ አሲ ወሪካ ኤካናሰ ቤሲዛይሳ። ናጋራንቻታፔካ አዲዛ ናጋራንቻይ ታና። 16 ጊዶ አቲን ታ ማሪቲዳይካ ዬሱስ ኪርሰቶሲ ዛዋይ ባይንዳ ባ ዳንዳያ፣ ኡባፌ አዲዳ ናጋራንቻ ጊዲዳ ታ ቦላ ቤሲዳይ ኢዛን አማናናይታሰኔ ሜርና ዴዖ ዳማናይታሰ ለሚሶ ጊዳና ማላ። 17 ሄሳ ጊሽ ሜርናሰ ሃይቂ ኤርንታ፣ አይፌን ቤቲ ኤርንታ ባርካ ያላ ያሴ ጊዲዳ

---

\* 1:13 ሃዋ 8:3፤ 9:4-5

ካዎስ ሜርናፔ ሜርና ጋካናስ ኢዛስ ቦንቾይኔ ጋላታይ ጊድ።  
አሚን።

18 ታ ና ዓምቶሳ ኔ ጊሽ ካሴቲዲ ዮቴቲዳ ማላ ሃይሳ አዛዘዛ  
ታ ኔስ አማዲስ። ሄሲካ ኔ ሄ ቃላ ካላሼ ሎዎ ባዪ ባዪታናሳ።  
19 አማኖይኔ ሎዎ ቆፋይ ኔስ ዴዎ። ኢሲ ኢሲ አሳቲ ባ ሎዎ  
ቆፋ ዬዲ አዲዲ አባ ቦላ ሜቶይ ኢዛ ቦላ ጋከን ዋዬቲዛ  
ማርካቤ ማላ ባ አማኖ ዳይሲዳ። 20 ኢስታ ጊድን ያሳ ጫሽ  
አጊዲ ታማራና ማላ ታኒ ፃላዔስ አላ ኢሚዳይቲ ሄሜኔዎሲኔ  
ኢስከንዲሮሲ ዴቴስ።

## 2

### ያሳስ ሳይኖ ጊሽ ኢሜቲዳ ዎጋ

1 ሄሳ ጊሽ ኡባፌ ኮይሮ ሃራ አሳስ ሾቤላ ዎሳ፣ ጋናቴላ ዎሳኔ  
ጋላታ ዎሳ አሳ ኡባስ ካዎታሲኔ ዴሬ አይሲዛይታስ ኡባስ ዎሳና  
ማላ ታ ኔና ቆፊሳይስ። 2 ሄሲካ ቱሙ አያና ዴሳኒኔ ጌሻቴላ ኡባን  
ኑኒ ሳሮቴላኒኔ ዎጋን ዳና ማላሳ። 3 ሃይሲ ኑና አሺዛ ያሳ አቻን  
ሎዎኔ ኡፋይሲዛዛ። 4 ኢዚ አሲ ዉሪ አታና ማላኔ ቱማ ኤራና  
ማላ ኮዬስ። 5 ኢሲ ያሲ ፃላ ዴስ። ቃሴካ ያሳሲኔ አሳስ ጊድን  
ኢሲ ጊሊሲዛ ጋናይ ዴስ። ኢዚካ አስ ጊዲዳ ዬሱስ ኪርሰቶሳ።  
6 ኢዚ ባና አሳ ኡባስ አሌ ኢሚዴስ። ሄሲካ ሄራካ ዎዴይ አዶንታ  
ኢዛስ ማርካቲዴስ። 7 ታካ ሃይሳስ ሚሺራቾ ዮታናስ ከቲቲዳዴ።  
ቃሴካ ዴሬታስ ቱሙ አማኖ አስታማሬ ጊዲዳ ሹሜታዲስ። ሄሳካ  
ታ ዎርዶቶንታ ቱሙ ዮታናሳ። \*

8 ሄሳ ጊሽ አቱማ አሳይ ኡባ ሶን ሃንቆይ ባይንዳኔ ፓላማይ  
ባይንዳ ባ ጌሻ ኩሼታ ፑዴ ቶቁ ሂስቲዲ ዎሳና ማላ ታ ኮያዬስ።  
9 ሃሳሶካ ማጫሳቲ ቦንቾራ ባና ሺሺ ኤኪዲ ቤሲዛ ማይዎ  
ማይዔቶ፣ አቲን ባ ሁዔ ዳዲ ኤኪዲ ዎይኮ አልዎ ማይዎ፣  
ዎርቃኔ አንቁ አሊዲ ዎልቅ ዎልቅ ሳፔቶ። \* 10 ጊድ አቲን ያሴ  
ዎሶስ ጊዛ ማጫሳቲ ኢስታስ ኦሳና ቤሲዛ ሎዎ ኦሶን ሎዔቶ።

11 ማጫሲ ጮቡ ጋዳ ኩሜላራ አዛዜቴላ ታማራ። 12 ማጫሲ  
ጮቡ ጋናፔ አቲን ኢዛ ታማርሳና ማላ ዎይኮ አዴ ቦላ ጎዳታና  
ማላ ታ ኮዬኬ። 13 ጋሶይካ ኮይሮ አዳሚይ ሜዴቲዴስ፤ ካላዳ  
ሄዎና ሜዴታዲስ። \* 14 ቃሴካ ኮይሮ ባሌቲዳይ አዳሚ ጊዴና።

\* 2:7 2ዓም 1:11 \* 2:9 1ጴፀ 3:3 \* 2:13 ሜዴ 2:7፤ 21-22

ባሌታዳ ያሳ ዋጋፔ አዲዳይ ማጫሳዮ። \* 15 ጊዲኮካ ማጫሲ አማኖኒኔ ሲቆን ጌሻቴላን ባርካ ባና ሃርን ሚኒኮ ና ዬሎን አታና።

### 3

#### ዋሳ ኬላ ካሌሊዛይታ

1 “አኒካ ዋሳ ኬላ ጨማ ጊዳና ኮይኮ ሎጾ ኦሶ አሞቴሰ” ጊዛ ቃላይ ቱማ። 2 ሃሳ ጊዲኮ ዋሳ ኬላ ካሌሊዛይይ ቦሬይ ባይንዳይ፤ ኢሲ ማቻ ዲዛ አይ፤ ገናራ ዲዛይ፤ ባና ሃሪዛይ፤ ዋጋራ አቁዛይ፤ ኢማላ ሞኪዛይ፤ ታማርሳናሰ ዳንዳዪዛይ፤ 3 ማሶቶንታይ፤ ኦሽ ኦዬቶንታይ፤ ቃሰ ማራጌ አሰ፤ አሳራ ፓላሜቶንታይ፤ ሚሽ ጎድንታይ፤ ጊዳናሰ ቤሴሰ። 4 ባ ናይታ አዛዘቲዛይታኔ አሰ ቦንቸዛይታ ሂሰቲ ዲቺዲ ባ ኬላ አሳ ዋጋራ አይሲዛይ ጊዳናሰ ቤሴሰ። 5 ኢሳይይ ባ ኬላ አሳ ዋጋራ አይሶ ኤሮንታ አገኮ ያሳ ዋሳ ኬላ ዋሰቲ ናጋና ዳንዳዪዛይ? 6 ኦቶሬቴላን ቸርዲ ዓላዔይ ኩንዲዳ ፐርዳን ኢዚ ኩንድንታ ማላ ኦራሳ አማኒዛይ ጊድፖ። 7 ቃሴካ ኢዛ ሱንላን ቦሬቶንታ ማላኔ ዓላዔ ናርዓን ኢዚ ጌሎንታ ማላ አማኖንታ አሳ አቻን ሎጾ ማርካቴላ ዳናሰ ኮሼሰ።

8 ዳቆኔቲካ ሃሳሉ ቦንቸቲዳይታኔ ባ ጊዳ ቃላ ለሚ ለሚ ዬሳንታይታ፤ ዳር ዋይኔ ኡሻሰ አሞቶንታይታ፤ ኦጌይ ባይንዳ ጎዓ ጎድንታይታ ጊዳናሰ ቤሴሰ። 9 አማኖ ፀራ፤ ሎጾ ቆፋራ ናጋናሰ ቤሴሰ። 10 ሃይታንቲካ ኮይሮቲ ፓጩቴቶ። ኢሲ ኢታይ ኢሰታ ቦላ ቤቶንታ አገኮ ሃሳፌ ጉዬ ዳቆኔቴላን ኦሌቶ። 11 ማጫ ዳቆኔቲካ ቦንቸቲዳይታ፤ ዘገሮንታይታ፤ ቃሰ ዋጋራ ዲዛይታ፤ ሃኖ ኡባን አማኔቲዳይታ ጊዳናሰ ቤሴሰ። 12 ዳቆኔቲ ኢሲ ማቻ አይ ጊዳናሰ ቤሴሰ። ቃሴካ ባ ናይታኔ ባ ኬላ አሳ ዋጋራ አይሲዛይታ ጊዳናሰ ቤሴሰ። 13 ዋጋራ ኦሊዳይቲ ኤራይሰ ገታ ቦንቸኔ ዬሱሰ ከርሰቶሳን ኢሰታሰ ዲዛ አማኖን ዳር ዓላቴላ ዳማና።

14 ታ ኔኮ ኤሌ ባና ኮይኮካ ሃይታ አዛዘታ ኔሰ ዓፋይሰ። 15 ታ ሃኖ ኔሰ ዓፋዛይ ታ ጋምዒዛ ጊዲኮካ አሳይ ያሳ ኬላን ዋኒ ዳናኮኔ ኔ ኤራና ማላ ጋዳኮ! ኬላይ ዴጾ ያሳ ዋሳ ኬላ፤ ሄሲካ ቱሙ ቱሴኔ ዓጾ። 16 ቱሙ አያና ዲሳ ፀራይ ሲዴይ ባይንዳ ገታ፤ ኢዚካ

“አሴ ጊዲዴሰ፤  
ኢዛ ጊሎቴላ ጊሎ አያናን ቆንጨዲዴሰ፤

\* 2:14 ሜዴ 3:1-6

ኪታንቻታሰ ቤተዳሰ፤  
 ዳሬ ኡባሰ ሳባኬተዳሰ፤  
 አላሜን ዲዛይታን አማኔተዳሰ፤  
 ቦንቾራ ፑዳ ዳንዲ ቢዳሰ” ገዛይሳ።

### 4

#### ዎርዶ ታማርሲዛይታ

1 ዎዳ ዉርሲሴላ ቦላ ኢሲ ኢሲ አሳይ አማኖ አገዲ ባሌላዛ አያናታኔ ኢታ አያና ቲሚርቲ ካላናይሳ ዒሎ አያናይ ቆንጨራዮቴሰ። 2 ሄሳ ማላ ቲሚርቲይ ኢሰታ ቆፋይ ቦንቆ ቢራታን ፀጉቲዳ ማላ ጌላቴላን ዶጨዳ ቆጴፔ ቆሞን ሃጊዛ ዎርዳንቻ አሳታፔ ያና። 3 ሄ አሳቲ አሳይ ኤኮንታ ማላኔ ጌሎንታ ማላ ዲጋና። አማኒዛይቲኔ ቱማ ሻኪ ኤሪዛ አሳይ ያሲ ሜጲዳ ካል ጋላታራካ ኤኪዛይቲ ሞንታ ማላ ዲጋናኔ አዛዛና። 4 ያሲ ሜጲዳይ ዉሪካ ሎዎ። አሲ ጋላታራ ኤኪኮ ዎራ ዎጲዛይ ኢሲናካ ባዎ። 5 ዉሪካ ያሳ ቃላኒኔ ዎሳን ጌያና።

#### ኪርሰቶሳሰ ሎዎ ኦሊዛ ኦሳንቻ

6 ሃይሳ ሃ አዛዛዛ አማኒዛ አሳ ኔ ቆፍሲኮ፡ አማኖ ቃላኒኔ ኔ ኤኪዳ ሎዎ ቲሚርቲዛን ሚናዳ ዩሱሰ ኪርሰቶሳሰ ሎዎ ኦሳንቻ ጌዳንዳሳ። 7 ያሴ ቦንቹሶንታ ጎዳይ ባይንዳ ሃይሲዔፔኔ ጨማ ማጨሳታ ሃይሲዔፔ ሃካዳ ቱማ አያና ኦሶሰ ኔ አሳቴላ ገጊሳ።

8 አሳቴላ አሾ ኦጊን ደሲሶይ ጉላ ዎዳሰ ጎዔሰ ሺን ቱሙ አያና ዲሳሰ ባና ታማርሶይ ጌዲኮ ሃይሳ ሃ አላሜዛሰኔ ቡር ያና ዲሳሰ ሂደታይ ዲዛ ገሽ ኡባሰ ጎዔሰ። 9 ሃይሲ ሃ ቃላይ አማኔተዳይሳኔ ዉርሲ ኤካናሰ ቤሲዛ ቃላ። 10 ኑ ሄሳሰ ጌዲ ዳፌቶሲኔ ዳቡሮሰ። ሄሲካ አሳ ኡባሰ ሃራፔካ አማኒዛይታሰ አሺዛ ዳዎ ያሳን ኑ ሂደታ ኦሊዛ ገሻሳ። \*

11 ሃይታ ዮዎታ አዛዛኔ ታማርሳ። 12 ኔ ያላጋቴላ ኦኒካ ሌቆፎ፤ ጌዶ አቲን ኔ ሃሳያን፣ ኔ ዲሳን፣ ሲቆን፣ አማኖኒኔ ገሻቴላን አማኒዛይታሰ ሎዎ ለሚሶ ጌዳ። 13 ታ ሄ ባና ጋካናሰ ቃላ ናባባናሰ፣ ዞራናሰኔ ታማርሳናሰ ሚና። 14 ጨማቲ ኔ ቦላ ባ ኩሼ ዎሊ ዎሲሺን፣ ኔሰ አሜቲዳ ቲንቤቲ አሞቴላ ሌፒ ሂሰታ አጎፋ። 15 አሲ ዉሪ ኔ ዲቻ ቤያና ማላ ሃ ዮዎታ ሎዔላ ሚንላዳ ዳንዲያን

\* 4:10 ዳፌቶሲኔ ኢሲ ኢሲ ቢርሼታ ማፃፋቲ “ባፃቶሰ” ገሺን ኢሶቲ ኢሶቲ “ጫዬቶሰ” ጌዲ ቢርሼዳ።

ፖላ። 16 ኔ ዲሳ ጊሺኔ ኔ ታማርሲዛ ቲሚርቴዛስ ናጌታ። ሃይታን ሚና። ኔ ሃሳ ኦሊኮ ኔናኔ ኔ ጊዛይሳ ሲዪዛይታ ኣሻና።

### 5

አምዔታ፡ ጨማታኔ አይሌታ ጊሽ አሜቲዳ ዞሬ

1 ጨማ አሳ ኔ አዋ ማላ ቦንቸራ ዞራ ኣቲን ደምዖፋ። ናቴላ ኣቱማ ናይታ ኔ ኢሻታ ማላ ያላ። 2 ሂሳሉካ ጨማ ማጫሳታ፡ ኔ አይ ማላ፡ ናቴላ ማጫሳታ ቃሴ ኔ ሚቹታ ማላ ሱሬ ዋዝናፔ ያላ።

3 አዳፌ ሜቶቲቲዳ አምዔታ ሎዔላ ናጋ። 4 ኢሲ አምዔይሰ ናይ ዋይኮ ና ናይ ዲዛ ጊዲኮ፡ ሄ ናይቲ ባሶ ኣሳታ ማዳናሲኔ ባና ዬሊዳይታስ ካሴ ኢሰቲ ኦሊዳይሳ ኩሼ ዛርን ሃራፔ ካሴቲዲ ባ አማኖ ኦሶን ቤሳናሲኔ ታማራናሰ ቤሴሰ። ሄሲካ ያሳ ኡፋይሲዛይሳ።

5 ቃሴ ተማፔ ማዳይ ባይንዳ፡ ባርካ ዲዛ አምዔያ ያሴ ያላ ያላዉሰ። ዋሳሲኔ ያሳፌ ማዶ ዳማናሰ ጋላሲኔ ቃማ ሚኔታዉሰ።

6 ሃ ቢታ ሎዖ ዲሲ ያላ ኮዪዛ አምዔያ ጊዲኮ ኢዛ ፓዖ ዳሼ ሃይቁደር። 7 ኦና ቦላካ ዋሶይ ደንታ ማላ ሃይሳ አዛዘዛ አሳሰ ኣላ። 8 ኢሲ ኣሲ ባ ዳቦታ ሃራፔካ ባሶ ኣሳ ማዶንታይሳ ጊዲኮ ኢዚ አማኖ ካዲዳዴኔ አማኖንታ ኣሳፔካ ኣጂ ኢታ ኣሳ።

9 ኢዚሰ ላይላይ ኡሱፑን ታሙ ላይላፌ ጋርሳን ዲዛ አምዔይ ሱንላ፡ አምዔታ ማዝጋባን ዓፎፓ። ቃሴካ ኢዛ ካሴ ኢሳይ ያላ ጌልዳሮ ጊዳናሰ ቤሴሰ። 10 ናይታ ዲቸኒኔ አማላ ሞኮን፡ አማኒዛይታ ቶሆ ሚቻን፡ ሚቶቲዳይታ ማዶኒኔ ሎዖ ኦሶን ኡባን ባና ኣላ አማዳ ሎዖ ኦሶንካ ኬሃ ኤሬቲዳሮ ጊዳናሰ ቤሴሰ።

11 ናቴላ አምዔታ ጊዲኮ ሃሳ ማላ ማዝጋባን ዓፎፓ። ጋሶይካ ኢሰታሰ ዲዛ አዚናራ ዳና አሞይ ኢሰቲ ኪርሰቶሳሰ ኦላና ጊ ጌሊዳ ቃላፔ ቦላራ ኣጂዛ ዋዴ ኣዴ ጌላና ኮዬቴሰ። 12 ኢሰቲ ካሴ ጫቁዳ ቃላ ሚዛ ጊሽ ሄ ዮዖዛን ባ ቦላ ፒርዳ ኤሄቴሰ።

13 ሃሳፌካ ኦሶ ኦላናፔ ዩዩ ዩዩ ኣሳ ኬሌ ጌላና ደሴቴሰ። ኦሶ ኢዖ ያላ ጊደንታ ሃሳያናሰ ቤሶንታይሳ ሃሳዪሼ ዘጊርዛይታኔ ኮሽንታ ኣሳ ዮዖ ጊደ ጮ ዋዩ ጌሊዛይታ ጊዴቴሰ። 14 ሃሳ ጊሽ አዚናቲ ሃይቁዳ ናቴላ ማጫሳቲ ኣዴ ጌላና ማላ፡ ናይታ ዬላና ማላኔ ባሶ ኣሰ ኣይሳና ማላ፡ ሞርኬይካ ኢሰታ ቦላ ዋሊዛ ሚሹ ዳሞንታ ማላ ታ ዞራይሰ። 15 ኣዳካ ሃይሳፌ ካሴ ኢሲ ኢሲ ኣሳቲ ያላዔ ካላና ጉዬ ሹርዒ ጊዳ። 16 አማኒዛ ማጫሲ ኦኒካ ባሶ ኣሳ ጊደን አምዔቲ ዲዛ ጊዲኮ ዋሳ ኬሌ ቱሙ አምዔታ ያላ ማዳና ማላ

ኢዛካ ባ ባጋራ ባ አምዔታ ማዲ ኣቲን ዋሳ ኬላሰ ቶሆ ጊዳና ማላ ኣጋጉቱ።

17 ዋሳ ኬላ ሎዔሊ ኣይሲዛይቲ ሃራፔካ ሳባኮኒኔ ታማርሶን ሚኒዛ ጨማቲ ጊዲኮ ዳኮ ማዶ ማዴታናሰ ቤሴሰ። 18 ማፃፋን “ካሕ ቡኪዛ ቦራ ዲና ቃሻፋ” ቃሴካ “ኦሶ ኦሊዛዴይ ዳሞዛ ኤካና ቤሴሰ” ጌሰ። \* 19 ናምዑ ማርካይ ዋይኮ ሄሹ ማርካይ ማርካቶንታ ዲሺን ጨማ ቦላ ሸቁዛ ሞቶ ኤኮፋ። \* 20 ሃራቲ ቤይዲ ናጌታና ማላ ናጋራ ኦሊዛይታ ኣሳ ኡባ ሲንላን ሃንቃ።

21 ያሳኒኔ ዬሱስ ኪርሰቶሳን ዶሬቲዳ ኪታንቻታ ሲንላን ሃይታ ኣዛዘታ ኦናካ ማዶንታ ኔ ናጋና ማላኔ ኢሲ ሚሺካ ታ ጎሪፔ ዘቂ ቶቄ ሂሰቶንታ ማላ ታ ኔና ሃዳራ ጋይሰ። 22 ያሳ ኦሶስ ዶራናሰ፣ ኦና ቦላካ ኔ ኩሼ ዋሳ ዋሳናሰ ኤሶቶፓ። ቃሴ ሃራታራ ናጋራ ኦሳናሰ ዙፔቶፓ። ናጋራፔ ኔና ዒሎቴላን ናጋ።

23 ኔና ቃንላን ሳኪዛይሳሲኔ ዴንላ ሳኮዛ ጊሽ ዋይኔ ጨጃፌ ጉሕ ጉጃዳ ኡያ ኣቲን ሃይሳፌ ጉዬ ሃሌ ፃላ ኡዮፓ።

24 ኢሲ ኢሲ ኣሳ ናጋራይ ፒርዳይ ያናፔ ካሴቲዲ ቆንጨሰ፤ ባጋይታ ናጋራይ ቃሰ ፒርዳፌ ጉዬ ቆንጨሰ። 25 ሎፆ ኦሶይካ ሄሳ ማላ ቆንጨ። ቆንጨንታይ ዲኮካ ቆቴቲ ኣቴና።

### 6

1 ያሳ ሱንሊኔ ኢዛ ቲሚርቴይ ጨዬቶንታ ማላ ኣይሌቴላ ቃምባራ ጊደን ዲዛይቲ ወሪ ባ ጎዳሰ ኩሜላ ቦንቻይ ቤሲዛይሳ ኤሬቶ። 2 ኣማኒዛ ጎዳቲ ዲዛ ኣማኒዛ ኣሸካራቲ ጎዳቲ ኢሰታሰ ኣሸታ ጊዲዳ ጊሽ ጎዳታሰ ቤሲዛ ቦንቻ ኣሜቶ። ሃራፔካ ኢሰታ ኦሶን ማዴቲዛ ኣማኒዛ ጎዳቲ ኢሰታሰ ዶሴቲዳይታ ጊዲዳ ጊሽ ኔካ ሃይታንታ ማላ ዮፆታ ታማርሳናሲኔ ዘራናሰ ቤሴሰ።

#### ዋርዶ ቲሚርቴይ ቱሙ ዲሬቴሕ

3 ኣኒካ ዋርዶ ቲሚርቴ ታማርሰኮ ጎዳ ዬሱስ ኪርሰቶሳ ሎፆ ቃላኔ ኣያና ቱሚርቴላ ሚኒሲዛ ቲሚርቴራ ጋጎንታይሳ ጊዲኮ፣ 4 ሃሳዴይ ኦቶሬቴላን ኩሚዴሰኔ ኣይኮካ ዩሺ ቆፔና። ኢሲ ኢሲ ቃላታ ጊሽ ፓላሚታናሲኔ ኦዬታናሰ ኢታ ኣሞይ ኢዛን ዴሰ። ሄይቲካ ቃናቴሕ፣ ኦሽ፣ ጫሽ፣ ኢታ ሲጼ ካሌሌቴሰ። 5 ቱማይ ኢሰታፌ ኤኩቲ ጊዲን ኤራይሰ ኣያና ኦሶን ዋጼ ዴማና ሚሳቲዛ ኣሳታኔ ቆፋ ፓጩ ኣሳታ ጊደን ጎሼቲዲ ዲፆንታ ኦሽ ኤሄቴሰ።

\* 5:18 ዛሬ 25:4፤ ማቶ 10:10፤ ሉቃ 10:7 \* 5:19 ዛሬ 17:5-7፤ 19:15

6 ጊደ ኣቲን ቱሙ ኣያና ኣስ ጊደል ኮስ ዲዛይሳን ዎፑ ጊዲ ዲሳራ ገታ ዎቋ። 7 ጋሶይካ ኑ ሃይሳ ሃ ኣላሚዛ ዪሼ ኣይኮካ ኤኪ ዪቤኮ፤ ቢሼካ ቃሴ ኣይኮካ ኤኪ ቦኮ። 8 ጊደ ኣቲን ኮስ ማናይሴኔ ኑ ማይዓናይሴ ዲኮ ጊዳና። 9 ዲሬ ጊዳናስ ኮዪዛይቲ ጊዲኮ ጌዴ ፓጩኒኔ ናርዓን ጌሊዲ ኦይኬተዛይሳ ማላ ዳር ሃዳኒኔ ኢታ ኣሞን ኡንዔቴቴስ። 10 ጋሶይካ ሚሻ ሲቆይ ኢታቴል ኡባስ ፃጶ። ኢሲ ኢሲ ኣሳቲ ዲሬ ጊዳና ጊዲ ኣሞፔ ዴንዲዳይሳን ኣማኖ ኦጌፔ ባሌቲዲ ሃራሶ ቢዳኔ ባርካ ባና ዳር ሜቶ ጊደ ጌልልዳ።

**ጳውሎሲ ዓምቶሳስ ኢሚዳ ሃዳራ ቃላ**

11 ኔኖ ያሳ ኣሶ! ኔ ሄሳ ኡባፌ ባቃታ። ዒሎቴል፣ ቱሙ ኣያናን ዱስ፣ ኣማኖ፣ ሲቆ፣ ዳንዳያኔ ኣሽኬቴል ካላ። 12 ኣማኖ ባዔ ሎዔላ ባዔታ። ዳር ማርካታ ሲንላን ሎዎ ኣማኔቴላን ኔ ማርካቲዳይሳኔ ኔ ኢዛስ ዔይጌቲዳ ሜርና ዴዎዛ ሎዔላ ኦይካ። 13 ኡባስካ ዴዎ ኢሚዛ ያሳ ኣቻን ሄሳሶካ ጳንያሳ ጲላያሳ ሲንላን ቱማ ማርካቲዳ ዬሱስ ኪርሰቶሳ ሲንላን ታ ኔና ሃዳራ ጊዛይ፣ \* 14 ጎዳ ዬሱስ ኪርሰቶሲ ቆንጫና ጋካናስ ኔስ ኢሜቲዳ ኦሶዛ ዎሶይ ባይንዳ ኔ ፖላና ማላ። 15 ሄ ቆንጩላይ ኣንጃቲዳይሲ ባርካ ኡባ ሃሪዛይሴኔ ካዎታ ካዎይ፣ ጎዳታስ ጎዳይ ኢዚ ባ ዎዴን ቤሳና። 16 ኢዚ ፃላ ሃይቆንታይሳ። ኦኒካ ሺቃናስ ዳንዳዮንታ ፖፖ ጊደን ዴስ። ኢዛ ቤዪዳ ኣሲ ኦኒካ ባዎ፣ ቤያና ዳንዳዪዛይካ ዴና። ኢዛስ ዎልቃይኔ ቦንቾይ ሜርናፔ ሜርናስ ጊደ። ኣሚን።

17 ሃይሳ ሃ ኣላሚዛን ዲሬቲዳይቲ ኦቶሬቶንታ ማላ ኣዛዛ፤ ኑ ኡፋዬታና ማላ ወርሲካ ዳርሲ ቲርፊሲዲ ኮስ ኢሚዛ ያሳን ኣቲን ኣማንሶንታ ሚሻን ኣማኔቶንታ ማላ ኣሳስ ዮታ። 18 ሎዎ ኦላና ማላኔ ሎዎ ኦሶን ዲሬታ ጊዳና ማላ፣ ኪያታኔ ሻኪ ኢማናስ ደሲዛይታ ጊዳና ማላ ኣሳ ኣዛዛ። 19 ሄሳሶካ ቱሙ ጊዲዳ ዴዎ ዴማና ማላ ቡርፔ ያና ዎዴስ ኣሳይ ሚኖ ፃጶ ጊዲዛ ሃር ኤራይስ ሺሻና።

20 ዓምቶሳ፣ ኔ ሃዳራ ኤኪዳይሳ ወርሳ ናጋ። ያሳ ቦንቹሶንታ ሃዳ ዲና ሎሞዑ ሎሞዓፔኔ ዎርዶ ኤራቴል ጌቴቲዛ ኣሲ ባፔ ማዲ ኬሲዳ ቲሚርቴፌ ሃካ። 21 ኮስ ሄሳ ማላ ኤራቴል ዴስ ጊዛ፣ ኢሲ ኢሲ ኣሳቲ ሄሳሶ ኦሶን ኣማኖ ኦጌፔ ባሌቲዳ። ያሳ ኪያቴል ኢንቴናራ ጊደ።

---

\* 6:13 ዮሃ 18:37



## ኦሪሳ ጩቆ ማግኒ ጋሞሳ

### **New Testament in Gamo (ET:gmv:Gamo)**

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 29 Sep 2022 from source  
files dated 29 Jan 2022  
dffa0cbb-5f77-5875-bf95-f4176677af45